

1A SESSIONE STRAORDINARIA PER 2017

26 è 27 DI GHJENNAGHJU

N° 2017/E1/002

**DUMANDA ORALE POSTA DAI
À NOME DI U GRUPPU « PRIMA A CORSICA »**

OGETTU : STATUTU DI RESIDENTE.

O Sgiò Presidente di u Cunsigliu esecutivu,

U 2 di dicembre scorsu, in sequitu à una lagnanza posta da una persona, u Tribunale amministrativu di Bastia annulla l'arrestatu di u Prefettu di Cismonte cun data di u 16 d'ottobre 2014, chì autorizava a creazione di l'Associu Fundariu Pasturale di a Valle di Siscu.

Ùn tocca mancu à pena à u nostru gruppu nè mancu à a nostra Assemblea di prununzià si in quantu à u motivu d'issa annullazione

- prima di tuttu, per via chì sò concernati 760 prupietari è chì, pè unepochi trà quessi, in particolare i giovani agricoltori, si tratta di u so avvene ;
- è dinù chì a cumuna pare ch'ella metti in ballu un'altra prucedura, ed hè propiu di sennu ghjustissimu.

Ma per contru, ùn ci hè più da dimustrà ch'elle sò propiu di ghjudiziu è fundate isse accolte di prupietarii di terreni, ch'elli sianu privati o pubblici custituite nantu à un perimetru agrupasturale (o furestieru) da assicurà ne o fà ne assicurà a messa in valore o a gestione di i fondi inclusi in issu perimetru.

Di fatti ùn si pò nigà ch'ellu si tratta di un arnese di accunciamentu unicu :

- in termini di gestione integrata di u spaziu pasturale furestieru, ma ancu in gestione di l'acqua è di l'ambiente in modu più glubale ;
- in termini di lotta contru à u spezzà fundariu ;
- in termini di salvamentu è di valorizzazione d'un fundariu chì ùn si puderia fà in modu individuale ;

In definitiva, l'AFP sò ricunnisciuti da dispositivi fattivi da pudè tuccà l'ogettivi di sviluppu ritenuti da u PADDUC.

Malgratu issi elementi pusitivi, vuleria vultà, o Sgiò Presidente di u Cunsigliu esecutivu, nantu à una pusizione publica pigliata in una cunferenza di stampa fatta in Siscu u 14 di ghjennaghju scorsu, da una cumpunente di a vostra magiurità è chì accerta, in sustanza, chì « u statutu di residente hè digià appiichevule, chì à chì compra da speculà sarà esprupriatu » !

Dinù custi mi pare impussibile di ùn ramintà vi u votu di u 24 d'aprile 2014 chì porta nant'à a prutezzione di u patrimoniu fundariu.

A sapete, è benissimu a sapete, quant'ellu hè statu difficiule à purtà issu cartulare custindi ! L'avanzate ch'è no avemu pussutu buscà sò state per mezu di un cunsensu custruitu cun pazienza nant'à sugetti cumplessi assai è capaci à volte da fà spiccà a ghjente.. Ma fatta fine, a deliberazione di u 24/04/2014 hà cunclusu micca ch'ellu era effettivu un statu di residente, ma ch'ella era necessaria-citu i termini « d'apprufundisce e quistione » mosse da issa deliberazione « per raportu à i principii fundamentali di a Custituzione è di u dirittu europeu ». È quessa sviluppatu in 6 quistione –micca di menu- da fà ne a spertizia.

Da fà la corta, simu luntanu, propiu luntanu da una messa in opera !

Ma quantunque, dopu lettu e dichjarazione di i cullegghi di a vostra magiurità, simu in dirittu, -à minima di interruggà ci – citu:

- « isse lege ch'ùn sò zuccate in u marmaru di a lege francese, per noi si ponu appiicà subitu avà »,
- « si pò fà per via chì dumane saremu in misura di legiferà » ;
- È per fà la finita : « u Statu francese ricunnosce à pena ciò chì li pare ».

O Sgiò Presidente di u Cunsigliu esecutivu, quandu ch'è no avemu sgrignatu l'usciu pè u dialogu, quandu ch'è no aviamu fattu attu di e nostre priurità è di a nostra cuesione d'inseme per sopra à e divergenze chì sò nostre, aviate dettu « ùn principiemu micca castrendu ci ». Oghje cù isse pusizione custindi, hè minacciatu u cunsensu ellu stessu, cun pusizione simule...Di pettu à discorsi simuli, avarete da lacà castrà ciò chì hè statu l'impegnu di a nostra lotta ?

Pensate ch'ellu ùn vale più u cunsensu ?

É tandu, site d'accusentu per dì di sì à issa cunferenza stampa ?

S'ella era cusì, pigliereste u risicu di neutralizà u travagliu impurtante fattu in a mandatura di prima...

É po dinù, o Sgiò Presidente di u Cunsigliu esecutivu, chì hè a vostra apprezzazione di u dirittu naziunale, in qualità vostra d'elettu di a Republica, vistu chì a vostra spertizia in dirittu vi dà un'auturità accertata? È in quantu à voi, issu dirittu hè da appiicà si in Corsica ?

À ringrazià vi

